

المصدر: السياسى المصرى

التاريخ : ١٩٩٣/٦/٢٧

الرئيس السادات يستدعيني لمقابلاته عشية أحداث سبتمبر

د . محمد إسماعيل على يكتب :

السادات يتنبأ!

ذكريات واستمعاب بحصية
مع الرئيس السادات .. وعند

حادث المنصة حال دون التغيير الذى كان الرئيس
أنور السادات يعتزم إجراؤه فى أكتوبر عام ١٩٨١

حكاية - الراى الثالث .. والذين يمسون العصا من النصف !!

رغم معرفتي بأسباب
إستدعائي لمقابلة السادات ،
ومشاعر الرعب التي إنتابتني
ليلتها ، فقد صممت على كتابة
رسالة إليه ، أسلمها له شخصيا ،
إذا عجزت عن الكلام ، فأنا لم
أجرب الكلام في مثل هذه
الشخصيات الأسطورية .. ثم
إنني عندما كنت موظفا .. كانت
أمنية المقابلة للمدير العام أمنية
عزيزة المنال .. بل عندما أراه
(يروح مني الكلام وانساه) !!

وكثيرا ما يجف ريقى ولا
أعرف ماذا أقول .. فأقف مبهورا
مبهوتا ومذعورا أيضا .. فكيف
أقابل كبير الكبراء .. ورئيس
الجمهورية !!

□ كانت قيادتي للسيارة . على
الطريق الزراعى للاسكندرية
محفوفة بمخاطرة التجربة الاولى
للقيادة ، والتفكير المشتت فيما
عساه أن يكون بينى وبين
الرئيس ...

نزل أخواى ، على ومصطفى
عند مدخل إستراحة المعمورة ،
وجلسا تحت شجرة فى شارع
قريب من الاستراحة ، والوجل
والخوف باديان على وجهيهما ،
ومع دعواتهما ، إتجهت إلى طريق
ضيق ، تسده (خشبة) ترتفع
لتسمح بمرور السيارات قابلنى
(مساعد - صول) يلبس بدله
بيضاء :

- أيوه يابيه رايع فين ! .
- أنا جاى علشان أقابل
الرئيس ..

- إسم حضرتك إيه ؟
- محمد إسماعيل على ..
نظر المساعد فى ورقة صغيرة
معه ، وترك الحبل بالعارضة
الخشبية لترتفع .. وأواصل
سيرى بالسيارة مسافة لا تزيد
عن خمسين مترا .. ووجدت
أمامى مبنى كاستراحات الرى فى
المحافظات .. يقف أمامه ضابط
برتبة عقيد أو عميد .. تقدم إلى
مبتسما :

- أى خدمة يافندم ..
- أنا محمد إسماعيل على
معايا ميعاد مع الرئيس ..

- أفضّل يا فندم ...
وقادنى إلى مدخل
الاستراحة

مساحة المدخل لا تزيد عن
سبعة أمتار في سبعة .. على يمين
المدخل دورة مياه .. وفي مواجهة
هذا البهو الصغير باب يؤدي إلى
غرفة واسعة .. فيها عدد من
الكراسى الإسبوطى القديمة
والبسيطة ، والتي لا تختلف كثيراً
عما يوجد في دوار العمدة ..

جلست على أحد الكراسى ..
على حافة الكرسى .. مضطرباً ..
مرتبكاً .. أنظر حولي .. منتظراً
إنقضاض رجال الأمن على .. !!
... وكان يتوسط هذه الغرفة
سلم خشبى نازل من الدور الثانى
.. لم أجرؤ على النظر إليه
طويلاً ..

مرت لحظات كأنها دهر ، بعمر
الخوف والوجل .. وخمس دقائق
بتوقيت ساعتى ...

- سمعت وقع أقدام على هذا
السلم .. تنزل رويداً .. وقلبى يدق
بعنف .. ناظراً إلى معصم اليد ،
مستعداً لتقديمها للقيود الحديدية

.. فلما اقترب صوت الأقدام ، لم
أقاوم رغبتى فى التطلع إلى
الشخص الهابط من الدور
الثانى ..

- كان الرئيس السادات ،
بقوامه السمهرى الرشيق ..
وبشرته السمراء .. ووجهه الذى
إرتسمت عليه خبرة السنين
الطويلة والبايب فى يده يسحب
منه أنفاس (الأمفورا) ...
والبدلة (التى شيرت) الزرقاء
الداكنة ذات الاكمام الطويلة
والعيون العميقة الاغوار ...
أهلا يا اسماعيل ...

- أهلا يا أفندم .. ازاي
حضرتك ...

وضع يده على كتفى
وقال :

- أنت أعد هنا ليه فى
الحر . تعالى يا شيخ فى
الجنينه ع البحر نشم
الهوا

وقادنى إلى حديقة لم ار
بحرا تطل عليه .. وبها

مجموعة من كراسي البامبو
 ... جلس .. ثم جلست بعد
 أن قال :
 - اتفضل يا إسماعيل ..
 دا بيتك ...
 □ أحسست أنني لست
 مع رئيس جمهورية .. ولكنى
 مع رجل عادى ... فلاح ...
 ابن بلد ... صديقى ...
 قريبي ... لا حواجز ...
 ولا قيود ولا حدود ...
 - انا باقرا لك يا
 إسماعيل كل اللي بتكتبه ..
 ومبسوط منه اوى وعاوزك
 تستمر فى الكتابة ...
 - متشكرين ياريس ..
 بس الحقيقة أنا عايز اكتب
 كثير ... بس مساحات النشر
 لا تسمح دائما ...
 - مساحات إيه !! ..
 اكتب زى ما انت عاوز فى
 أى وقت .. وانا حاكلم عبد

الله .. [يقصد عبد الله
عبدالبارى] .

- شكرا يافندم ...

- دانا اللى اشكرك مش

أنت اللى تشكرنى .. وأنت

كانك بتقرأ اللى فى دماغى

وتكتبه مع أنك مش بتقعد

معايا ...

- يمكن يا أفندم عشان

أحنا بيئة واحدة !!

- فلاح يعنى ؟

- يعنى .. الريفى البسيط

.. الفقير .. اللى بيعبر

بتلقائية عن أفكاره ...

- بس الفلاح لئيم

ياإسماعيل ... الفلاح

ماينضحكش عليه أبدا ...

- أنا مش فلاح .. أنا ابن

خياط عادى وبسيط ...

- هو دا المصرى .. مش

يعنى البرجوازى اللى

بيسموه الابالسة

الشيوعيين ...

- ضحكت وضحك هو
كثيرا . ثم قال :

- أنا عايزك تشتغل
معايا في السياسة ...

- ما أنا باشتغل فيها
ياريس ...

- بتشتغل فيها فين ؟

- باكتب في السياسة
يعنى .. وكمان في
العواطف ..

- لا لا .. دي اسمها
صحافة اللي بتشتغل فيها
.. أنا عايزك تشتغل معايا ،
في السياسة .

- ازاي يعنى ياريس ...

- حاقولك بعدين .. هو
فيه تغيير كبير حاوصل في
اكتوبر اللي جاى ..
وحاتعرف بعدين ...

إنما أنا عاوزك تكتب
كمان في جريدة مايو ..

- بس ياريس دي جريدة
الحزب الوطنى ...

- وايه يعنى ! ؟ قصدك

ايه ! ؟

- قصدى إنى لو كتبت فى
جريدة الحزب الوطنى
حابقى بتاع الحكومة والناس
مش حاتصدقنى ويقولوا دا
بقى بتاع الحزب ...

- وماله الحزب الوطنى

ياإسماعيل ! ؟

- يعنى ... الناس بتقول
إنه فيه إنتهازيين وأصحاب
مصالح عاوزين يستفيدوا
وبس ...

- ماهى دى المصيبة ..

انا عارف كل دا .. ومنصور
حاول يعمل حاجة ... وكل
ما نقول حنجيب ناس
كويسين يجيلك الاف
يقولوا إنهم كويسين ..
يطلع منهم حراميه ويطلع
منهم كويسين .. حا
نعرفهم إزاي .. انا غلبت
معاهم ...

- طيب ماهو مركز
الدراسات بتلع منصور
حسن ياريس كان ماشى
كويس ، وحايطلع كوادر
كويسه ...

- المركز ده حكايه ثانيه
... ومنصور زعل لما كلمته
وقال مش قادر ، قلت له
خليك في مجلس الشعب ...
- عموما ربنا يوفق ياريس
... المهم مش في عدد
الاعضاء المهم نوعيتهم ...
- اهو واحد زيك لما
يشتغل معايا
يساعدنى .. ونبتدى في
مايو ...

- طيب ياريس لى طلب ..
تدينى الامان ...
- طبعا ...

- حا اكتب في مايو .. بس
تحت عنوان « الراى
الثالث » ...

- يعنى ايه الراى
الثالث ! ؟

- يعنى اللى بيقول رأيه
هو .. ومش لازم يكون مع
المعارضة أو مع الحكومة أو
ضدهم ...

- لا لا .. سيبك من
حكاية الراى الثالث دى ..
تعرف الناس حاتقول إيه
عليك ! ؟ .. حايقولوا دا
عايز يمسك العصايا من
النص وينافق الاثنين ...
- لا ياريس .. أنا عايز
أكتب اللى أنا بافكر فيه
بس ..

- طيب ماتكتب .. بس
بدلا من حكاية الراى
الثالث دى .. هو أحنا حا
نعمل العالم الثالث هنا يا
إسماعيل واللا إيه !!
□ وشد أنفاسا عميقة ..
وطلب لى الشاى ...
وقلت :

- طيب بدلا من العنوان
ياريس ... بس أكتب اللى أنا

عاوز أقوله سواء أختلف أو

إتفق مع رأى الدولة :

- أنا عاوز كده .. عاوز

إخلاص فى الكتابة .. أكتب

كل اللى أنت عايز تقوله ..

مفيش قيود عليك ...

- بضمنان سيادتك

يا أفندم ... ؟

- باقولك اكتب زى ما

انت عاوز ... انت ولد

مخلص مش زى ولاد ال

() عاملين لى وطنين ..

بتوع الميه السخنه

والياقات المتنشيه ...

□ وإنطلق السادات فى

وصف عاصف لبعض

المعارضين ، شارحا لى تاريخ

كل منهم ، بتفصيلات دقيقة

، وقال :

- انا لازم اوضع حد

للكلام دا البلد مش ملكى

ولا ملكهم .. دى مصر ...

واليهود منتظرين اى

خلخلة فى الجبهة الداخلىة

□ لم اكن فى الحقيقة اعرف
هذه الاجراءات الحاسمة ولم اكن
اعلم انها هى إجراءات ٥ سبتمبر
.. وللحقيقة التى لا يعلمها إلا الله
، إننى لو كنت أعلم شيئاً مما
جرى بعد ذلك بساعات لأعلنت
رأىى للسادات بصراحة .. لأن
حديثه لى كان يشجعنى على
ذلك

ولهذا ، عندما صدرت هذه
الاجراءات ، فى ٥ سبتمبر وبدأت
أكتب فى جريدة مايو .. تناولت
هذه الاجراءات فى مقال لى بعنوان
« الحى على كراهية نظام الحكم
جريمة من ؟! » وانصب نقدى
على بعض أعضاء الحزب وبعض
الوزراء الذين تحض تصرفاتهم
الاستفزازية ، على كراهية نظام
الحكم ...

وأثناء إنفعال السادات
بمهاجمة خصومه السياسيين
حاولت تهدئة الموقف وخصوصاً
عندما حضر (الشاى) فى براد
من ذلك النوع البسيط ، مع

اكواب صغيرة يعتبر فنجان
القهوة بالنسبة لها برميلا أو
خزانة ... وكان السادات يأخذ
(شفته .. أو اثنين) وينتهي
الكوب فيصب بنفسه كوبا آخر لي
وله على طريقة أهل الخليج ...

إنتهزت فرصة صمت الشاي
لأحول الحديث العاصف إلى
مسار آخر فسألت الرئيس :
- أنا لاحظت ياسيادة الرئيس
وأنا داخل

- لاحظت إيه ؟ !

- الراجل الوصول اللي على
البوابه لم يتحقق من شخصيتي ،
وبمجرد ما قلت له أنا فلان ، راح
فاتح البوابة ودقيقتين ياريس ،
لقيت نفس قدامك .. مش دا خطر
عليك ؟ ! مايمكن حد عرف إنى
حاقبك ويدعى إنه أنا ويعتدى
على حضرتك بسهولة ...

□ سكت السادات قليلا ...
وقام بهذ البراد وكشف غطاءه
ليرى إن كان الشاي قد إنتهى ...
وطلب برادا آخر ... واضطجع
راميا بصره بعيدا ...

- شوف يا إسماعيل ... أنا

مؤمن بان الأعمار بيد الله ... أنا
رحمت المنصورة . وعارف إن
الواد عبود الزمر ممكن يعملها
ويدينى دفعة رشاش ... وكل
يوم ، نبوى بيقولى على حاجات
... أنا مابحيش الحراسة ...
حاهرب من قدرى !! وبعدين
على فكرة ياإسماعيل .. الناس
بتحببنى ... إنت بتشوفهم
بيقابلونى إزاي فى الطريق
- أه بس الناس بيقولوا دول
بتوع عربيات النقل اللى كان
بيشحنهم الاتحاد الاشتراكى ..
- دا كلام فارغ .. دا كلام
الحاقدين .

لكن ... أنا عارف ، إنه ممكن
فى اى لحظة ، يطلع على شوية
مجانين بالرشاشات
ويضربونى ... !!



نبوی اسماعیل



عبود الزمر